

09/09/2001

Permulaan emas Malaysia (HL)

V Ashok; Halmi Samad

KUALA LUMPUR: Malaysia memulakan cabaran hari pertama Sukan Sea XXI-Kuala Lumpur 2001 dengan membanggakan apabila meraih dua pingat emas dan satu perak daripada empat acara akhir, semalam.

Ketika Indonesia meraih pingat emas pertama pada temasya sulung alaf baru ini dengan penguasaan sepenuhnya sukan menembak, emas Malaysia diperoleh melalui acara ekuestrian dan pasukan gimnastik artistik lelaki.

Kejayaan memberangsangkan itu disulami dengan upacara pembukaan penuh gilang-gemilang di Stadium Nasional Bukit Jalil, malam tadi, sambil 10 negara anggota Asean mengukuhkan tali persahabatan dan keakraban menerusi bidang sukan.

Suasana penuh semangat dan kemeriahan yang tercetus pada majlis perasmian itu seperti menggambarkan kebangkitan semula negara-negara rantau ini daripada kegawatan ekonomi dan masalah politik yang melanda sebelum ini.

Stadium terbesar negara bergema dengan dentuman bunga api dan cahayanya serta kilauan laser apabila tuan rumah menyediakan persembahan menarik bagi menyambut kedatangan 6,000 atlit dan pegawai dari negara-negara peserta.

Yang di-Pertuan Agong Sultan Salahuddin Abdul Aziz Shah merasmikan temasya sukan dwitahunan itu yang kembali ke Malaysia selepas giliran penganjuran 12 tahun lalu.

Tembakan meriam 10 das bergema sejurus selepas Seri Paduka mengisytiharkan pembukaan sukan kali kelima yang berlangsung di negara yang menganjurkan Sukan Komanwel terbaik, tiga tahun lalu.

Buat pertama kali juga, pembukaan diadakan serentak di Johor Bahru dan Pulau Pinang di mana beberapa acara turut berlangsung. Negeri Sembilan turut menjadi tuan rumah beberapa acara.

Tepukan bergemuruh menyambut ketibaan Seri Paduka dan Raja Permaisuri Agong Tuanku Hajah Siti Aishah serta Perdana Menteri Datuk Seri Dr Mahathir Mohamad dan isteri, Datin Seri Dr Siti Hasmah Mohd Ali ke stadium yang boleh memuatkan 100,000 penonton.

Antara tetamu khas yang turut hadir ialah Perdana Menteri Thailand, Thaksin Shinawatra.

Turut hadir ialah Timbalan Perdana Menteri, Datuk Seri Abdullah Ahmad Badawi, Menteri Belia dan Sukan, Datuk Hishammuddin Hussein dan Presiden Majlis Olimpik Malaysia dan Persekutuan Sukan Sea, Tunku Imran Tuanku Ja'afar.

Seramai 4,166 atlit dari 10 negara, termasuk Malaysia yang bakal bertanding dalam 32 acara, berarak ke gelanggang dengan langkah megah membawa bendera negara masing-masing dalam upacara pembukaan penuh bercahaya itu.

Hampir 100,000 penonton turut menyaksikan bekas jaguh lumba basikal negara, Daud Ibrahim diberi penghormatan menyalakan obor Sukan Sea.

Daud adalah pemenang lima emas Sukan Seap pada 1971 dan pemenang pingat emas acara 1,600 meter di Sukan Asia 1970.

Sambil itu, Nur Herman Majid, pemenang pingat emas lima kali Sukan Sea dalam acara 110 meter berpagar pula diberi penghormatan selaku pembawa bendera kontinjen Malaysia ketika mengiringi atlit dan pegawai yang berpakaian tradisional Melayu.

Olahragawati Kebangsaan 2000, Noraseela Khalid pula dipilih untuk melafazkan ikrar kejohanan kali ini.

Terdahulu, dalam larian membawa obor, 21 bekas jaguh sukan termasuk dari Kemboja, Singapura, Laos, Vietnam, Indonesia, Myanmar, Brunei dan Filipina turut serta sebagai satu penghormatan atas kejayaan dalam disiplin masing-masing di temasya yang lalu.

Mereka adalah Datuk Soh Chin Aun, Marina Bhatt, Lisa Kwan, Sabiamad Abdul Ahmad, Nurul Huda Abdullah, Zulkifli Yaakob, V Subramaniam, M Mahendran, G Shanti, Sylvia Ng, Adnan Saidin (Malaysia), Kim Mom (Kemboja), Patricia Chan (Singapura), Bounhom Siriphone (Laos), Pham Huynh Tam Lan (Vietnam), Elfira Rosa Nasution (Indonesia), Anat Ratanapol (Thailand), Jennifer Tin Lay (Myanmar), Awang Yakud Mohamad (Brunei) dan bekas ratu trek Filipina, Lydia De Vega.

Mendahului perarakan masuk kontinjen malam tadi adalah Brunei diikuti Kemboja, Indonesia, Laos, Myanmar, Filipina, Singapura, Thailand, Vietnam dan Malaysia.

Kontinjen Thailand adalah paling ramai kali ini membabitkan 397 atlit lelaki dan 300 atlit wanita, diikuti tuan rumah, Malaysia (380-293), Indonesia (324-269), Vietnam (236-195), Singapura (298-199), Filipina (307-245), Myanmar (212-147), Brunei (120-34), Laos (102-28) dan Kemboja (76-22).

Terdahulu, pencapaian pasukan gimnastik itu serta equestrian yang menyumbang dua pingat - satu emas dan satu perak - meletakkan Malaysia di tempat kedua dari segi pungut pingat keseluruhan di belakang Indonesia yang mendahului dengan 2-1-1.

Thailand, selaku juara Sukan Sea Brunei 1999, berkongsi tempat ketiga bersama Singapura dengan masing-masing memperolehi satu perak. Dua lagi pasukan yang turut memenangi pingat ialah Vietnam dan Myanmar, masing-masing dengan dua dan satu gangsa.

(END)